



復齋公自述

余自幼孤露備歷艱辛每一回首潛然淚下今老矣聊述一二以示子孫

康熙五十六年丁酉十月初五日申時余始生時先

贈君年三十九先

贈母年四十

五十七年戊戌二歲先

贈君始遊庠



贈君一生績學博極羣書爲文一稟先正無時下習氣
故見知也晚

五十八年己亥三歲

五十九年庚子四歲

六十年辛丑五歲三月余始出痘至五月又出蓋

前此所出非真痘也緣是毒氣未盡自夏徂秋患
瘡特甚

六十一年壬寅六歲

雍正元年癸卯七歲始入塾讀書業師御天姪孫



二年甲辰八歲先

贈君授徒在家余與先兄俱在塾

三年乙巳九歲七月二十九日先

贈君卒享年四十有七

贈君一生喜茗爲濕氣所中因此漸成疾遂致不起是
年余就周尊姪受業

四年丙午十歲仍就周尊姪受業

五年丁未十一歲仍就周尊姪受業

六年戊申十有二歲春始讀史漢業師成九姪九

月十一日先兄亦文卒存年一十九歲十二月初
八日生大母祝太孺人卒享年八十有三七年己
酉十三歲始習舉子業業師昆垂姪孫八年庚戌
十四歲就岐陽姪受業十二月十三日舉先大母
殯暨

贈君先伯父與先

贈君先兄之柩俱耐葬於祖塋之西原凡營葬之費以
祖遺房屋典於姪孫繩武僅得價七十金不能成
禮草草而已



九年辛亥十五歲就介吉姪孫受業余自先

贈君見背後祖遺田一十三畝早已蕩然連年讀書之
費俱自先

贈母紡績中來也

十年壬子十六歲就姪孫左言受業時束修雖薄
家不能具賴世兄黃君納言世伯秦君田來分任
之七月二十九日

贈孺人先伯母卒於南塘伯姊丈華肯堂家伯姊伯母
出也時余經理殯葬頗竭蹶先是兄亦文嗣先伯

父後不幸於雍正六年早亡至是余遂以小宗後
大宗承兩祧焉

十一年癸丑十七歲授徒於葛家橋蔣氏奉先

贈母同往蔣氏故農家屋宇淺隘書堂房室井竈共聚
一室童子六七人又一無善狀勉強挨至十月遂

辭歸

十二年甲辰十八歲筠軒趙先生招余至家讀書
并不計修脯朝夕訓誨學問頗有進益蓋筠軒先
生爲先伯父高弟推及師恩爰有是舉實今人所

難也

十三年乙卯十九歲授徒於跨丈涇蔡氏始就試
蓋余自九歲以後連年在制不獲與故也

乾隆元年丙辰二十歲仍授徒於蔡氏

二年丁巳二十一歲仍授徒於蔡氏逸帆姪孫亦
授徒於鄰近鄒家每課徒之暇卽聚首同席拈題
作文文成就正於姪孫學林自是文章稍爲一變
三年戊午二十二歲仍授徒於蔡氏二月就院試
首題霜露所隊至淵淵其淵次題仲子所居之室

余以第十一名入泮是秋鄉試首題行之以忠次
題相在爾室一節三題五畝之宅至不負戴於道
路矣余卷爲備卷本房有三藝俱穩當老成之評


十二月十二日娶妻華氏

四年己未二十三歲仍授徒於蔡氏

五年庚申二十四歲授徒於跨丈涇鄒氏七月二
十二日先

贈母許太孺人卒享年六十有三

六年辛酉二十五歲仍授徒於鄒氏二月長女生



七年壬戌二十六歲授徒於蘇州觀瀾姪家

八年癸亥二十七歲仍授徒於觀瀾姪家

九月甲子二十八歲授徒於句容沈廣文署中時

句容前縣令周庶常羈留在縣庶常諱應宿浙江

山陰人學問宏深文章以奇闢爲主時至學署與

余論詩談文間亦講究經義深得其秘要是秋鄉

試薦而未售首題樂則韶舞次題果能此道矣一

節三題人知之亦囂囂四節房師爲霍山縣李公

十年乙丑二十九歲授徒於蘇州顧氏九月十一

日長子生

十一年丙寅三十歲仍授徒於顧氏

十二年丁卯三十一歲仍授徒於顧氏鄉試首題
巧笑倩兮一章余文無甚作意房考亦以少作意
三字了之

十三年戊辰三十二歲仍授徒於顧氏

十四年己巳二十三歲仍授徒於顧氏秋間瘟疫
大作族中有一家死至七八口者孺人華氏亦大
病幾危幸子通曹先生在鄉延之醫治方愈

十五年庚午三十四歲仍授徒於顧氏四月十七日長子殤是科鄉試首題致遠恐泥二句次題淡而不厭三題拱把之桐梓全章於文未經房薦主司却批領會獨深四字殆搜閱落卷爲主司所賞而仍未得售諒落卷中佳作多也十月十一日次

子文炳生

十六年辛未三十五歲授徒於嘯傲涇姪孫衛封家

十七年壬申三十六歲是年爲


皇太后六十萬壽奉

旨於二月中特設

恩科首題可與言而不與之言全章次題地道敏樹三
題大匠誨人必以規矩余文以四十八名獲售大
座師叔度裘公諱曰修副座師蕢邨邵公諱樹本
房師滿洲聖公諱寶五月計偕北上至九月下泮
不第南歸仍授徒於衛封家

十八年癸酉三十七歲仍授徒於衛封家

十九年甲戌三十八歲正月仍上春官不第五月



南歸仍授徒於衛封家中秋後得三日瘧病至來
年方愈

二十年乙亥三十九歲仍授徒於衛封家

二十一年丙子四十歲仍授徒於衛封家八月七

日次子文鈞生

二十二年丁丑四十一歲仍授徒於衛封家久瘧

方痊未能北上冬間贖回所典之屋

二十三年戊寅四十二歲仍授徒於衛封家

二十四年己卯四十三歲仍授徒於衛封家十二

月二十四日長女出嫁於吳

二十五年庚辰四十四歲正月再上春官不第因

來春

皇太后七十萬壽特開


恩科留京未歸居停於同年薛璞菴庶常寓後又移至

同年顧晴沙戶部寓至九月授徒於部郎皂公家

八月五日次女生

二十六年辛巳四十五歲再試禮闈仍不第八月

南歸授徒於楓橋程氏



二十七年壬午四十六歲仍授徒於程氏秋間孺
人華氏得肝氣病服藥載餘得少痊嗣後時發時
愈

二十八年癸未四十七歲正月再上春官仍不第
南歸十月二十九日舉先

贈母許太孺人殯與先

贈君合葬於祖塋之西原

二十九年甲申四十八歲復授徒於衛封家

三十年乙酉四十九歲仍授徒於衛封家

三十一年丙戌五十歲再上春官不第榜後旋奉
恩旨挑選余列一等四月十九日引

見余以知縣試用籤掣浙江五月南歸六月二十日
到浙八月奉委監督慈谿城工十一月工竣回省
是時同班至浙者先後其六十人

聖恩浩蕩千載一時然而挨科題補竟有數年未得缺
者余之沐

恩深矣

三十二年丁亥五十一歲二月二十一日家眷來



浙三月湖守甘太尊以德清城工艱鉅監督難得
其人謬以余力請於大吏余因奉委監督旋卽委
署縣篆四月二十九日到任德清故劇邑漕政中
積弊尤多其間侵蝕過多者書役十居八九前令
范公以此去官余爲清理其弊置之法者二十四
人八月二十五日卸任仍畱監督城工是時先後
交代幾至束手待斃蓋前令老而黠缺交數至四
千後令刻而精絲毫不容短少宦途之苦已於此
見一斑矣

三十三年戊子五十二歲五月上澣工竣回省旋
奉委催辦湖州合屬緊要案件逗畱湖州半月適
接部議降一級調用緣德清任內有差役蔡某
者催糧誤犯命案擬軍大部爰有是議八月二
十七日督撫給咨赴部家眷亦於是日回籍十月
十五日引

見特蒙

恩旨幸免降調十二月七日到浙卽日委署甯波府同
知篆



三十四年己丑五十三歲正月望後家眷復來浙
二月三日之宜波同知任是時同城者提督段公
秀林參政潘公恂郡守王公繩曾縣令商公皓學
博齊公世南余以閒散之員與諸公或角射或飲
酒或賦詩追陪讌會幾無虛日余在宦海數年此
正風恬浪靜時也八月三日卸同知事之天台任
天台在萬山中地瘠民貧撫綏未易余下車首先
革去衙蠹羅某次又訪得訟棍袁某積窩袁某俱
置之法其餘大概以撫循爲主終余任民皆悅服

焉十一月娶長媳楊氏三十五年庚寅五十四歲
八月以

皇太后八十萬壽特設

恩科余奉聘入闈拈得易二房得士六人魯萇馮元王
官任啟宇趙璫俞峻又副車一人吳桂先也三十
六年辛卯五十五歲是年春申詳齊侍郎入官房
屋改作書院顏之曰文明每朔望扃諸生於其中
做科場例試之余爲親定其甲乙是秋鄉試獲雋
者有三人一爲陳君錫洛一爲潘君肇疆一爲徐

君公鏞六七兩月大旱余自七月一日起遍城內
外沿途拜禱至十五日親往瓊臺下龍潭取水設
案焚香虔誠禱告是時遂得微雨及回縣甘霖大
沛仍獲有年九月長孫女生

三十七年壬辰五十六歲是年春以前歲

皇太后萬壽覃恩余例得

敕贈一代


敕命二軸不敢忘生我之恩以小宗後大宗之故申部
得

贈先伯父二范公文林郎天台縣知縣先伯母華太君
孺人

贈先府君二婁公文林郎天台縣知縣先母許太君
孺人謝

恩以後乃以子文炳嗣兄亦文後承先伯父之祧以子
文鈞爲余後承先府君之祧二月二十一日次女
亡三月二十六日量移象山士民遮道攀留者數
十里絡繹不絕十月初一日娶次媳吳氏

三十八年癸巳五十七歲八月二十六日罷官先



是於五月下澣出借常平倉穀有鄉民張某者與
倉書繆某爭鬧相扭喊稟越三日張某死張之親
戚隸副將麾下因謀之副將副將唆使上控後又
於委員檢驗時暗爲中傷倉書繆某遂罹重典余
亦因此被議十二月次孫女生文鈞出

三十九年甲午五十八歲正月自象山歸里

四十年乙未五十九歲二月余因老屋數間不蔽
風雨兼無墻垣稍爲葺治名其堂曰承恩蓋誌所
自也余自入泮卽蒙

恩廣額嗣後登賢書登仕版以及入闈校士皆出自格外之恩又恭遇

覃恩榮及先世一生閱歷俱在

湛恩汪濊之中故不可以不誌十二月七日長孫又唐生文鈞出

四十一年丙申六十歲在家塾課子

四十二年丁酉六十一歲授徒於楓橋艾氏三月

長子文炳入泮

四十三年戊戌六十二歲四月五日例



封孺人華氏卒享年六十有二孺人性甘淡泊躬習勤
苦卽隨任數年一如在家凡署中日用大小俱親
爲經理而於余蒞事時有加刑者退堂後尤必苦
口勸之蓋內助之賢者也十一月十八日長女產
亡年三十有八噫數月之間母女相繼而歿老淚
能無涔涔下耶

四十四年己亥六十三歲授徒於楓橋陳氏

四十五年庚子六十四歲在家塾課子三月二十


二日第二孫又起生文炳出

四十六年辛丑六十五歲在家塾課子二月偕族人修葺祖祠至五月工竣

四十七年壬寅六十六歲在家塾課子

四十八年癸卯六十七歲在家修輯宗譜吾族自進宗公遷錫後瓜瓞綿衍支派日繁譜經數輯至是公舉族弟來章任修輯事馬橋一支余據再姪宗啟所輯譜增訂之九月長子文炳江寧鄉試中式十二月偕計北上

四十九年甲辰六十八歲三月得脾洩疾越二年



始愈四月文炳下第歸八月馬橋支宗譜稿成十
一月開雕

五十年乙巳六十九歲在家塾課子長孫女許字
於華

五十一年丙午七十歲四月次媳吳氏卒五月次
子文鈞入泮六月婿吳中立卒中立性剛介少時
從余受業讀書通曉大義余薄宦數載佐理頗藉
其力卒時年僅四十有八實深悼之

五十二年丁未七十一歲爲次兒文鈞續娶於陳


長孫又唐聘王氏女正月文炳赴春官試五月下
第歸六月十二日第三孫女生文炳出

五十二年戊申七十二歲十月初八日三孫又瑋
生文炳出

五十四年己酉七十三歲正月文炳赴春官試緣
明歲庚戌恭逢

皇上八旬萬壽特開

恩科故是歲頂舉正科也文炳仍不售留京就館於憲
副哈介亭家



五十五年庚戌七十四歲四月文炳錄取內閣中書先是中書員缺 禮部奏准於會試遺卷內錄取炳名幸列榜末旋奉


諭旨中書歸甲班選用榜遂懸而復撤六月文炳歸八月次孫又起聘陳氏女十二月第四孫女生文鈞出

五十六年辛亥七十五歲二月次孫女出嫁於華孫壻太學生日燦

五十七年壬子七十六歲七月十三日第四孫又

讓生文炳出八月二十八日第五孫又福生文炳
出九月置再姪越千舊屋三間余因高祖楚山公
未有妥靈之地與再姪賓日兄弟謀立小祠以安
神主前歲已置宅西老屋二間規模太隘故復置
此是秋病噎冬至後就醫於江陰王道南服藥十
餘劑少愈

五十八年癸丑七十七歲正月文炳應上春官以
余病未痊遲回不發十五日命之束裝至二十二
日始起身北上



嗚呼此府君自述而未竟者自文炳北上以後
府君起居如故二月二十七日致祭始遷馬
橋祖祠登降拜跪如常儀猶不藉人扶掖二十
八日再姓宗啟屬跋先伯祖蓉峯公自述卷府
君援筆立就灑灑數百言文不加點不孝鈔侍
立視旁竊幸府君心神未衰也三月初一後日
惟進粥三四甌不能強飯不孝鈔延醫調治至
初五夜府君起如廁者再自是氣體疲倦日進
米飲一甌參飲杯許然神思清澈顏色溫愉猶

冀日漸就瘡詎料延至初十日戌時頓焉怛化也彌留之際府君顧不孝鈞而言曰居官以廉處家以儉持己以敬與人以誠吾生平永矢勿諉者在此汝曹所服膺弗失者亦惟此矣言已瞑目而逝時不孝鈞因試事羈京至四月十二日聞訃卽日奔馳回籍音容如在色笑何承不孝之罪萬死奚贖哉府君諱曜字震陽號復齋姓錢氏系出唐代吳越武肅王諱鏐後六傳至宋承奉郎進宗公諱進又十八傳至存素公諱



翊配黃孺人繼施孺人是爲府君曾祖考妣

生

例贈文林郎後素公諱之任配

例贈孺人朱孺人副祝孺人是爲府君祖考妣生

敕贈文林郎天台縣知縣長洲學廩膳生二范公諱

琰配

敕贈孺人華孺人是爲府君考妣

敕贈文林郎天台縣知縣邑庠生二婁公諱玉山配

敕贈孺人許孺人則府君本生考妣也嗚呼府君一

生梗概畧具是編卽臨終數語可以想見府君之生平也敬錄呈

當代大人君子

不孝文炳文鈞泣血稽顙謹識

賜進士出身

誥授中憲大夫原任甘肅甘涼兵備道署四川按察使
司前工科給事中浙江道監察御史兼戶部郎中
上行走年眷弟顧光旭頓首拜填諱



上海圖書館藏